

# ULAMA DI TANAH AIR KITA

“Orang-orang Kristian mengenal ulama sebagai “rahib”, orang Buddha mengenal ulama sebagai “pendeta suci”, pengikut Katolik mengenal ulama sebagai “Father” bermakna: bapa, tetapi orang Islam mengenal ulama sebagai orang yang dalam dan luas di dalam ilmu pengetahuan agamanya. Tentulah takrif dan pengertian orang-orang Islam ini semata-mata berdasarkan kepada kebanyakan faham ramai sahaja sedang hakikat ulama yang sebenarnya adalah lebih tinggi, jauh mendalam dari itu”. Kata Tuan Johari dan seterusnya banyak tulisannya yang jelas dan tegas ini:

(Oleh Johari Ahmad)

Di tanah air kita sendiri orang hanya mengenal ulama itu semata-mata orang yang pandai di dalam hukum agamanya, pandai membaca kitab agama – pandai syarah agama – pandai mengeluarkan hukum agama, dan kadang-kadang pandai pula mengadakan hukum-hukum itu, menambah dan menokoknya dengan seribu satu macam bida‘ah dan khurafat.

Ini adalah kenyataan yang sebenarnya tuan, kenyataan yang dapat tuan perhatikan di sekeliling tuan sendiri, tuan pergilah di tengah-tengah umat itu, tanyailah mereka siapakah ulama itu? Nanti akan mereka jawab: Oh! Tuan ini masih tolol benar lagi, kenapa sampai sekarang masih belum kenal dengan ulama, perhatilah orang itu, dianya berserban besar, dia tak suka banyak cakap, siang malam dia hanya bertafakur di dalam masjid!

Tuan usul lagi, setakat inilah gambaran tuan kepada saya untuk mengenali ulama itu? – Tuan, jawabnya: Ulama itu orangnya soleh, dia tak suka cakap soal dunia, dunia ini neraka Mukmin katanya, dan kita semua mesti meninggal dunia! Lagi tuan tanya, dia pun menjawab: Kalau ada tempat kenduri di sanalah akan tuan temuiinya

itu orang yang duduk di barisan hadapan, dilingkung oleh anak-anak muridnya.

Kemudian tuan tentu hendak tanya, bagaimana pendapat tuan dengan orang-orang yang tuan dengar namanya di luar tanah air kita disyorkan orang sebagai ulama? – Oh! Kenapa tuan tanya ini, mereka itu bukan ulama, bagaimana akan tuan hendak akukan mereka sebagai ulama pada hal terang-terang saya tengok mereka cintakan dunia, tuan bacalah kitab-kitab mereka, mereka bukan mengupas sifat dua puluh, bukan fasal masalah apakah air dua kolah kalau jatuh najis di dalamnya tetapi tidak berubah ‘ayn dan warnanya boleh diambil untuk bersuci, bukan mereka gaduhkan pasal “tariqat atau suluk” tetapi terang-terang mereka mempercakapkan soal dunia. Tuan tengoklah ulama di luar tanah air itu, kalau ada kitab yang mereka karang mereka selalu membabitkan soal agama dengan dunia, soal pendidikan, soal siyasah, soal mencari jalan bagaimana umat Islam boleh naik kembali yang mereka heboh-hebohkan, lupa mereka agaknya bahawa dunia ini syurga orang kafir.....!

Beginilah tuan-tuan pembaca sepantas lalu pendapat umum di tanah air kita di dalam mengenali siapakah ulama itu, sudahlah tentu pendapat ini adalah umat jauh terpesong daripada takrif dan ertinya yang asal, tetapi apa hendak dikata turun-temurun kita mengenali ulama-ulama ini sedemikian rupa hasil dari sogokan ulama-ulama kita pula!

Memikirkan ini teringatlah saya akan apa pernah dibayangkan oleh bapa HAMKA di dalam buku “Kenangan-kenangan hidup” tatkala menggambarkan pandangan rakyat di tanah seberang itu sendiri kepada ulama dan fahaman mereka dengannya, sebab itu tak hairanlah kalau di Minangkabau juga pada masa dahulu telah menerima nasib seperti mana yang telah kita terima sekarang daripada kemunduran faham di dalam agama dan falsafah ajarannya.

Alangkah jauhnya terpesong umat ini daripada hakikat kebenarannya yang diturunkan Tuhan! Di dalam al-Quran tegas-tegas Tuhan mengatakan “*Innamā yakhshā Allāh min ‘ibādihi al-‘ulamā’*” – bermaksud: Bahawa sesungguhnya orang yang sebenar-benarnya takut Allah itu ialah ulama semata-mata. Kalau orang yang belajar dan mendalami bahasa Arab akan terasalah keindahan al-Quran dan kukuhnya ayat ini diikat Tuhan. Tuhan

menggunakan kalimah “*Innamā*” – sesungguhnya – kemudian Tuhan ikuti dengan perkataan “Yakhshaa” bermakna – takut – kemudian Tuhan akhiri dengan perkataan “Ulama” – jadi ternyata Tuhan ikatkan perkataan takut itu semata-mata kepada ulama (*min bāb al-qāṣr – qāṣr al-ṣifah ‘alā al-mawṣūf*) kata ahli-ahli balaghah.

Tetapi jangan takut, ayat ini juga selalu dibaca orang – mereka tegaskan kepada umat bahawa mereka lah sebenar-benarnya takutkan Allah . . . sedang amalan di dalam kehidupan mereka sendiri kadang-kadang bercanggah benar dengan ajaran dan suruhan al-Quran itu sendiri.

Perkataan “*Yakhshā*” – perkataan . . takut” selalu benar salah pengertiannya oleh rakyat umum di tanah air kita. Orang selalu mengatakan bahawa “takut” itu semata-mata terlingkung kepada mengerjakan amal ibadat. Kalau kita tidak sembahyang – kita tidak takut Tuhan, kalau tidak berpuasa kita tidak takut Tuhan – tetapi kalau kita tidak turut sama memperjuangkan nasib Islam di tanah air kita, itu tidak “berdosa” serahkan ini kepada orang yang cintakan dunia . . ! Sedangkan bagi orang yang memahami makna yang dikandungkan oleh “*yakhshā*” itu, tentulah luas,



Di tengah-tengah A. Kamil Muhammad Kāmal Suḥaymī yang telah baylor melanjutkan pelajarannya di Universiti Mesir.



*Padang 'Arafah yang masyhur, penuh dengan khemah-khemah beratus-ratus ribu orang haji yang datang dari segenap penjuru dunia.*

apatah lagi bagi ulama-ulama itu sendiri.

Ulama-ulama tentulah mempunyai tanggungjawab bahawa kalau umat ini sudah sakit tenat dengan penyakit rohani dan kerosakan akhlak maka bangunlah ia mengubati penyakit itu dengan seluruh daya kekuatannya.

Ia melihat – bahawa sekarang pendeta Kristian berlumba-lumba mengembangkan agamanya. Maka timbulah di dalam jiwa mereka sendiri semangat keinsafan untuk melipatgandakan usaha penyebaran keIslamahan pula.

Ia melihat, bahawa sekarang anak-anak kita haruslah diasuh dengan semangat keagamaan yang sedalam-dalamnya, sekuat-kuatnya, bagi menjadi pemuda-pemuda yang bertanggungjawab masa depan kerana mempertahankan agamanya. Maka dicarilah usaha-usaha ke arah itu – digembangkan jiwanya sampai masak, diberilah erti, faham, dan pengajaran bagaimana harus kita berdiri pada masa sekarang berhadapan dengan segala puak yang sentiasa hendak merebut kedudukan kita.

Ia melihat bahawa sekarang penuntut agama tidaklah seharusnya menjadi “Kiyai” di desa-desa sahaja, alim di dalam

feqah semata-mata, tetapi hendaklah sama setanding dengan para terpelajar Barat – sebab dalam zaman sekarang kita bergerak bukan sahaja dengan kekuatan jiwa semata-mata, tetapi kita juga perlu kepada kekuatan akal dan kecerdasan berfikir seperti para terpelajar Barat itu. Maka diusahalah jalan ke arah itu.

Inilah intisari dari ajaran Tuhan di dalam al-Quran: *Ud'u ilā sabīlِ rabbika bilhikmah wa al-maw'iẓat al-hasanah;* Serulah manusia ke jalan Tuhanmu dengan hikmah – daya penarik – dan pengajaran yang baik – kebijaksanaan yang sesungguh-sungguhnya!

Ia melihat, bahawa sudahlah sampai masanya faham konservatif, jemu dan beku – tidaklah dapat digunakan lagi di tanah air kita bagi menghadapi segala masalah. Maka segeralah ia menukarkan fahaman itu kepada progresif – tangkas dan penuh berjiwa, asal sahaja semuanya itu tetap berdasarkan kepada asasi agama kita.

Ini semuanya saudara pembaca, sayang sekali tak ada pun kita saksikan pada ulama-ulama kita, saya tak tahu lebih jauh

keadaan lain negeri – saya tak tahu bagaimana keadaan di Kelantan, di Johor, di Perak dan sebagainya tetapi di negeri saya sendiri, negeri Kedah yang subur permai ini sudahlah saya saksikan setakat mana ulama itu mempunyai kegiatan dalam penyebaran agamanya.

Tuan-tuan pembaca!

Tentu ulama di negeri saya akan marahkan saya. Pandai budak ini mempercakap-cakapkan soal kami. Biarlah mereka marah – “budak ini biadab sekali” namun untuk berganjak daripada berterus-terang tidaklah akan saya undur teratur ke belakang.

Saya berkata: Saya tidak tahu lain, tetapi di tempat saya, saudara sendiri kalau datang ke tempat saya, negeri yang indah - hijau daun padi di waktu menanam kuning buahnya di waktu menuai, saudara perhatilah dengan sendirinya apa yang dibuat oleh ulama di sini.

Di negeri saya banyak terdapat sekolah agama. Kalau

saudara datang dari Pulau Pinang, tuan lalui jalan Tikam Batu – Sungai Petani ke Alor Setar sempatlah tuan saksikan dengan kepala tuan sendiri beberapa buah sekolah besar didirikan oleh ulama.

Mula-mula tuan bertemu dengan sekolah agama di Gua Cempedak kemudian tuan berjumpa Tawfiqiyah di Padang Lumut, kemudian tuan jumpa Nahdah di Bukit Besar, tuan teruskan perjalanan tuan – kemudian Ihyā’ al-‘Ulūm di Tanjung Pauh, tuan jumpa pondok di Melili hingga sampailah tuan ke Kodiang di sana tuan temui beberapa sekolah lagi!

Banyak lagi, ada sekolah agama di Langgar, ada di Bongor Baling, ada di Sungai Baru, ada pondok kecil di Tanjung Bedil, ini jangan tuan kirakan tempat yang kecil-kecil, di pelosok-pelosok kampung di mana kiyai-kiyai muda yang baru keluar dari pondok beberapa tahun mengajar – di merata-rata!


Tetapi sepanjang-panjang pengetahuan saya tidaklah ada satu perubahan pun yang telah dilaksanakan oleh sekolah-sekolah kita ini bagi perkembangan agama di negeri saya, sistem pelajarannya masih banyak terdapat cara lama, dan cara memahami pelajaran itu seratus-peratus berdasarkan faham yang sudah ditinggal belakang.

Di negeri saya ada kesatuan ulama, tetapi apa mereka buat terlalu gelap bagi umum. Tak pernah kita dengar mereka berura-ura memperkemaskan diri bagi lanjutan pelajaran penuntut-penuntut ke kolej-kolej Islam yang hendak dibuka itu. Tak pernah kita mendengar bagaimana usaha yang telah mereka jalankan di dalam usaha penubuhan kolej ini.

Di negeri saya udara agama amat lembab sekali, terutama di “pusat” – tetapi kita tak pernah mendengar ulama-ulama menjalankan sekurang-kurangnya usaha pendahuluan ke arah turut merubah, memperbaiki, dan membangunkan kembali. Ada terdengar mereka berjumpa, tetapi hasil perjumpaan ini terlalu benar tertutup bagi umum.

Negeri saya dimasyurkan negeri kecil yang banyak

*Mihrab peninggalan zaman ‘Abbasiyah di Karbala’.*



sekolah agamanya. Saya bermegah – negeri saya banyak pondok, banyak haji, banyak lebai-lebai, banyak tuan-tuan guru, tetapi negeri saya juga dimasyurkan orang sebagai negeri yang paling kolot sekali!!

Kalau saya sebagai penuntut agama, saya memakai songkok hitam, sekali-sekali memakai seluar panjang berbaju kemeja. Sekali sekala membaca buku agama keluaran baru, sekali sekala menghadiri persidangan besar-besar di mana berhimpun pemimpin-pemimpin tanah air memerhati dari jauh, sebagai mencari pelajaran – saya nanti akan dianggap – ini bukan murid agama. Ini budak gila! Kata saya bagaimana tuan ulama murid agama itu? Budak ini pekak lagi, bukankah telah aku suruhkan engkau memakai songkok putih, aku suruh hafaz “*Matan Ajrūmiyah*” – suara engkau mesti berlagu-lagu, jangan ikut penuntut Mesir, jangan tiru penuntut Mekah zaman ini, mereka ini sudah keluar daripada garisan asal yang kita pusakai.

Engkau mesti diam di pondok, engkau mesti wara’, walaupun kepalamu mesti selalu menekur ke tanah . . . ! Sekali saya membaca buku agama bahasa Indonesia, ada juga kadang-kadang saya belek-belek buku Inggeris walau pun saya sebenarnya dengan bahasa Inggeris ini seperti tikus dengan besi – apa kata tuan ulama pada saya, budak ini fasik! Bahasa Inggeris bahasa kafir!

“Amatlah kita ingin menyaksikan kembali keindahan Islam di tanah air kita, tetapi janganlah saudara mimpikan keindahan itu akan bersinar begitu rupa selagi ulama-ulama kita masih di dalam keadaan sekarang”.

Ulama-ulama kita jarang benar mengambil bahagian yang cergas di dalam siyasah, terutama sekali siyasah keislaman! Ulama kita tidak boleh sama sekali ditegur, kami bukan bodoh – tetapi mereka lupa mereka sudah ditinggal keretapi! Ulama-ulama kita tidak boleh dikata sebagai satu golongan yang dengan tak disedari telah berlaku tamak,

tetapi mereka lupa bahawa ada di antara mereka sudah ada yang kaya – tetapi zakat mahu lagi!

Ulama-ulama kita tidak boleh dikata bahawa mereka tidak menolong menyapu air mata si miskin, marah mereka – tetapi kalau tuan datang ke Alor Setar hari Jumaat tuan pergi ke Masjid Zahir tuan perhati lepas Jumaat, berderet-deret peminta-peminta sedekah menadah tangan – mereka membaca ayat suci – ayat suci tuan mereka tukar dengan sedekah wang ala kadar! Ulama-ulama kita tidak boleh dikata sebagai “batu penghalang” bagi pertumbuhan Islam itu sendiri di tanah air kita, kalau tidak tentulah mereka membaca habis-habis ayat suci ini kepada umat, tidak hanya terlingkung di dalam soal-soal ‘*ubūdiyah*’! Ulama-ulama kita tidak boleh dikatakan terlampau “lembik” kalau dikata ia marah – tetapi kadang-kadang kita lihat dia menjilat-jilat suatu golongan yang lain semata-mata kerana maslahat dirinya sendiri!

Saya tak tahu di negeri tuan, tetapi saya faham di tanah air saya – di mana tempat saya dilahirkan! Kita bukan membenci kepada ulama – tetapi kita membenci kepada sikap ulama – kita semua mencintai kepada ulama-ulama yang berfahaman luas, jauh pemandangan, meletakkan soal kecil ke tepi-tepi tetapi mengambil masalah umat itu sebagai masalah yang terpenting, dan akan penuhlah kasih mesra kita kepada ulama-ulama yang pernah disebut oleh Rasul yang bermaksud: “Berbahagialah sesuatu umat yang ulama-ulamanya adalah orang-orang soleh yang sebenar-benarnya.”

Mudah-mudahan hari inni akan menjadi hari yang sebaik-baiknya bagi ulama-ulama kita memikirkan dirinya kembali, dan bagi kita sendiri biarlah hari ini kita jadikan hari perbandingan, contoh dan tauladan di dalam perantauan menuju masa depan dengan lebih berhati-hati – kepada Allah kita semua memohon hidayah, serta kepada-Nyalah kita kembali.